

# Viagiond cun Paul Nay

## 37avel Top Pop Rumantsch

■ (rtr) Il 37avel Top Pop Rumantsch ans lascha udir il chantadur Paul Nay. Il nov Top Pop Rumantsch porta il titel «Schi lunsch naven» e vegn preschentà per l'emprima giada ussa gievgia, ils 11-09-2014 tranter las 11:00 e las 12:00 al Radio Rumantsch. Suenter in paus turna il Top Pop dal Radio Rumantsch cun ina nova producziun. Igl è la 37avla ediziun, ed ella preschenta quasi ina corifea da la chanzun moderna rumantscha: Paul Nay, il chantatur sursilvan ch'ans ha surprais avant tschintg onns cun in album producì fitg professional en l'America, s'annunzia enavos cun ina nova (pitschna) perla. Igl è ina chanzun che stat spezialmain a cor al chantadur, ed il titel tradescha er pertge: «Schi lunsch naven». Paul Nay sa regorda da meds populars, citond explicit la veglia chanzun da Tumasch Dolf tenor la poesia da Schamun Mani. Ed el confrunta aposta visiuns dal passà cun il mund modern, nua che viagià è daventà ina termagliada: «Schi lunsch naven sai oz sglar.» La melodia latiers è tipica per Nay – bufatga a l'entschatta, flurinta entamez e vairamain

opulenta vers la fin. D'udir a partir da gievgia sin las undas da Radio Rumantsch.

### Schi lunsch naven

*Da pign, sco affon  
accumpignavas ti mei  
pura melanconia  
derasavas sur mei  
oz suenter tons onns ei ton semidau  
tia melodia vai adattau  
ir oz el lontan tut auter che lu  
oz dat miu cor auter sinzur  
schi lunsch naven sai oz sglar  
e gia damaun puspei turnar  
vi star quiets er vinavon  
ei dat egl jester, egl jester ton  
ei dat egl jester ton  
ch'ins anfla buc a casa  
Da tiu temps mavas ti sin viadi  
cun cavagl e postigliun  
jeu mon en quei mument oz  
cun aviun entuorn il mund*

*il mund ei aschi datier oz  
mo tuttina aschi lontans*

*igl jester resta jester  
tgei gidan eroplans*

*schi lunsch naven sai oz sglar  
e gia damaun puspei turnar  
vi star quiets er vinavon  
ei dat egl jester, egl jester ton  
ei dat egl jester ton  
mo nuot mi plai sco sche savens  
jeu pos udir er cheu ils zenns  
els tunan grad sco leu tier tei  
els tunan grad sco cheu tier mei  
els tunan sco dacasa  
els tunan sco dacasa*

Top Pop Rumantsch è ina seria da producziuns da musica nova ed actuala, lantschada da RTR Radiotelevisiun Svizra Rumantscha l'onn 2005. Tut ils titels da la seria èn d'udir sin la pagina d'inter-net da RTR sut: [www.rtr.ch/home/dossiers/actual/Top-Pop-Rumantsch.html](http://www.rtr.ch/home/dossiers/actual/Top-Pop-Rumantsch.html)

**Las emprimas 30 chanzuns èn er disponibilas sin ils disc cumpacts Top Pop Rumantsch vol. 1 & 2 ch'èn da retrair tar: RTR, Via Masans 2, 7002 Cuira.**



Paul Nay en acziun.